



En ses pled d'avertura ha il parsura dal cussegl grond Vitus Dermont accentuà la muntada dal turissem per noss chantun. FOTO O. ITEM

«Engaschament a Berna era per il Grischun turistic»

Pled d'avertura da la sessiun d'october

■ **(anr/fa) 47 umens e 23 dunnas grischunas han candidà per ils tschintg sezs en il cussegl naziunal ed ils dus sezs en il cussegl dals chantuns. Il president dal cussegl grond Vitus Dermont giavischass dapliras dunnas en la politica.** «70 persunas da tut las parts dal Grischun èn stadas prontas da sa participar activamain a la vita politica e da s'engaschar a Berna a favur da noss pajais e da noss chantun», ha constatà il president dal cussegl grond *Vitus Dermont* (pcd, Glion) glindesdi durant ses pled d'avertura per la sessiun d'atun. El ha gratulà a las politicheras ed als politichers ch'èn vegnids elegids dumengia e giavischà a quels che n'han betg cuntanschi quel di lur finamira vivavant l'elan necessari per cuntinuar lur lavur politica. Dermont ha era menziunà la relaziun da 47 umens e 23 dunnas ch'èn vegnids elegids en il parlament federal. El giavischass per il futur dapliras dunnas che s'engaschassan per la politica en la vischnanca, en il chantun ed en la confederaziun.

Decisiun cun consequenzas sportivas ed economicas

Il president dal cussegl grond grischun ha era fatg in pèr patratgs davart la qualitat da la politica a Berna. Ina politica ch'elavura e che cuntanscha en diras debattas soluziuns consensualas per ina maioritad, quai è tenor el l'element cuminaivel il pli pitschen d'ina buna politica. «Questa politica da gullivaziun u da solidaritad ha manà la Svizra, ha manà noss chantun là, nua

che nus stain oz en l'Europa ed en il mund», ha ditg Vitus Dermont, avant che menziunar er in cunterexempel d'ina tala politica a Berna: I sa tracta qua da la refusa d'ina emna da sport da naiv obligatorica tras il cussegl naziunal, uschia sco ch'il cussegl dals chantuns aveva decis gia avant. «Ord atgna experientscha sai jau quant grev ch'igl è – malgrà campagnas da reclama che custan milliuns – d'augmentar il dumber da persunas che fan sport sin naiv en Svizra», ha ditg Dermont. Dapi onns vesan ils turisticchers ch'il dumber da champs da skis sa reducescha en Grischun. Ils respunsabels da manaschis da telefericas sa fatschentan cun la dumonda tge far per render il sport da naiv puspè pli attractiv per uffants e giuvenils. «Per nus en destinaziuns turisticas fissan champs da skis in med valabel, la finala vulain nus puspè intgantar la gliעד per il sport sin naiv», ha punctuà Vitus Dermont ed ha agiunt: «Sche nus vulain discurren en il proxim futur en Grischun puspè da gieus olimpics stuain nus intgantar l'emprim nosa atgna populaziun puspè per il sport d'enviern.» Tenor in studi da las Telefericas svizras fan marcantamain pli paucs uffants sport sin naiv. Che quest saja mo ina da las grondas sfidas, davant las qualas il turissem grischun stettia, ha concludì il president dal parlament grischun, «ensemien stuain nus prender per mauns l'incumbensa da chattar soluziuns per nosa sparta economica la pli impurtanta en noss chantun.»